

ТОНГ ЮЛДУЗИ

Ўзбекистон болалари ва ўсмирларининг газетаси

Газета 1929 йил 1 августдан чиқа бошлаган

№ 21 (66250)
2000 йил 25 май.

Сотувда эркин нархда

Истиқболга йўл

ОГОҲЛИК ВА ОЗОДЛИК

Ҳаётда ҳар бир нарса бир-бири билан занжир каби боғлиқ ва бу боғлиқлик ҳаётнинг асосини ташкил қилади. Демак, ҳар биримиз нимагадир боғлиқмиз, нималардир бизга боғлиқ. Асрлар оша ҳаёт тараққий топа бошлади, мураккаблашди. Шу билан бир қаторда Инсон даражасига етган одамнинг онги жуда тез ривожланиб кетди.

Она табиатимиз нақадар саҳий! У бизга ҳаёт давомийлигининг барча амалларини аямай ҳаёда этади.

Яхшиликка ёмонлик деганларидек, биз ундан фақат фойдаланишини билдик, уни асрамадик, аксинча, унинг бўшлиқларини тўлдиришнинг ўрнига кенгайтирдик.

Ўз-ўзидан табиий савол келиб чиқади:

Огоҳлик нима?

Нима сабабдан биз уни муқаддас даражага кўтардик?

Кимдан ёки нимадан огоҳ бўлишимиз керак?

Ҳозирги вазиятда буларнинг барчаси керак эмас, балки шарт. Огоҳ сўзининг маъносига илмий нуқтаи назардан қарасак, бу сўз кўп маъноли бўлиб, бўладиган ёки бўлиб ўтган иш-ҳара-

кат, воқеа, ҳодиса ва шу кабилардан хабари бор эканлигини кўрсатади.

Мана, ота-боболаримиз учун орзу-армон бўлиб қолган, қанча-қанча “Қутлуг қон”лар эвазига эришилган ва бизга насиб этган энг буюк неъмат - истиқлолга эришган йиллар мобайнида мақтанса арзигулик ютуқларга эришдик.

Аммо, тинч, фаровон турмушимизни кўра олмаган, “бузгунчи” муҳолифат ҳавфсизлигимизга таҳдид солди. Бунга яққол мисол - машъум феврал воқеаси. Бу воқеалар барчамизга сабоқ бўлди. Ҳавфсизликни ва барқарорликни таъминлаш - барчамизнинг кундалик ҳаётий ишимиз эканлигини англашга даъват этди. Ёшлар онгини заҳарлаётган шахсларга қарши маънавиятимиз билан курашишимизгина бизни жаҳолатдан сақлаб қолди.

Она Ватанимизни севиб-ардоқлаб, уни ҳимоя қилиш бизнинг бурчимиздир.

Мунира ВАЛИЕВА,
ТошДАЙ қошидаги лицей-
нинг 11-синф ўқувчиси.

Мустақил юртнинг фарзанди эркин фикр ва озод ғоя томон интилиши, ҳар бир воқеадан огоҳ бўлмоғи лозим. Зеро, огоҳлик муқаддас бурчдир! Огоҳликдек муқаддас бурчни унутган инсон ғафлат ботқоғига бир умр ғарқ бўлиб, унинг асирига айланади. Тушкунлик эса бора-бора инсонни қулга, манқуртга айлантириб, ота-онаси, ака-укасида маънан жудо қилади. Шу аҳволга тушмаслик учун атрофда бўлаётган воқеалардан огоҳ бўлиб, фарзандим, ака-укам нима билан шуғулланыпти, кимлар билан дўстлашди, деган савол ҳамиша бизнинг диққат марказимизда турсагина, огоҳликка муҳтож бўлиб, ташналикдан боши эгилган ҳаёт гулимизнинг чанқоғини боса оламиз.

Сўнгги пушаймон - ўзингга душман, дейди доно халқимиз. На-

хот, ўзимизга дўст орттириш учун душман изласак? Ўз бахтимизни диний экстремистик оқимларга оқизсак?

Кимсан, ўзбегимнинг номи алақандай шарпалар билан ўралиб, зулматга чўмса, миллатимиз келажаги тақир чўлга айланса? Бундай бўлмайди, асло!

Ўз-ўзимни алдаб яшабман гўё,

Наҳот кўз ўнгимда ҳаётмас рўё.

Юрак-бағрим тирнар истироб ногоҳ,

Наҳот бўлалмадим бахтимдан огоҳ,

-деб, оҳ уриб қолмаймизми оқибатда?..

Келинг, ҳаётимиз тинч, осуда бўлиши учун, агарда шуни истасак, огоҳлик шамширини белдан қўймайлик. Огоҳлик ва озодлик дастуримиз бўлсин!

Муножат САДРИДДИ-
НОВА, Алишер Навоий номидаги Республика Нафис санъат лицейининг 9-синф ўқувчиси.

БОЛАЛИК, СЕН ЎЗГАЧА ЭДИНГ

Сахар турсам, осмоним тиниқ,
Кўкда тонгги юлдузим ёниқ.
Гуллар тиниқ, кўнгиллар илиқ,
Болалик, сен ўзгача эдинг!

Ҳеч ким дилга беролмас озор,
Болаликдан ким бўлган безор,
Кўзимда ҳам қуларди баҳор,
Болалик, сен ўзгача эдинг!

Беғубор қалб неларга интиқ,
Ўтираган ойнадай тиниқ,
Кўнглим асло бўлмасди синиқ,
Болалик, сен ўзгача эдинг!

Далаларга термулиб боқсам,
Дунёни минг рангда кўрардим.
Қани мен ҳам сув бўлиб оқсам,
Майсаларга шудринг бўлардим!

Оддий қоғоз қушга ўхшарди,
Дилда ажиб ҳислар жўшарди,
Қалбимда шеър тўлиб тошарди,
Болалик, сен ўзгача эдинг.

Ҳали-ҳамон кўп соғинаман,
Ўша ерни, ўша елларни.
Кучгим келар ўша йилларни,
Болалик, сен ўзгача эдинг!

Мендан узоқ юрма олисда,
Эркаларди онам оҳиста.
Умрим энди жуда ёлғизда!...
Болалик, сен ўзгача эдинг!

Ботир РАМАЗОНОВ,
Юнус Ражабий номидаги Тошкент
педагогика билим
юрти талабаси.



РЕЙТИНГ КЎЗГУСИ

Ўқитувчимиз дастлаб рейтинг моҳиятини тушунтириб берганларида анча чўчиган эдик. Энди билсак, рейтинг мустақил ўқишга, ижодий фикрлашга, изланишга чорлар экан. Қозоқ тилида ўқисакда, ўзбек тилини чуқур ўрганишимизда рейтинг катта фойда берапти. Негаки, қанча кўп ўқисак, шунча кўп балл тўплаймиз. Ораимизда “Рейтингнинг бизга кераги йўқ”, - деган ўқувчилар ҳам топилди. Уларга жуда алам қиляпти-да, аввалгидек ялло қилиб юриш ўрнига, китоб ўқишга мажбур бўляптилар. Мактаб “Рейтинг кўзгуси”да паст балл тўплаган ўқувчилар уялиб қолишмоқда. Биз ҳамиша рейтинг тарафдоримиз ва бу усул бизга жуда керак деб ўйлаймиз.

Женисгул БАЙМУРАТОВА,
Гулзат ЖОРАБЕКОВА,
Навоий вилояти, Қонимех туманидаги
10-мактабнинг
8-синф ўқувчилари.

ЎЗБЕКЧАНИ ЎРГАНАМИЗ


Биз қозоқ синфида ўқиймиз. Лекин “Тонг юлдузи”ни ўз она тилимиздагидек мутлоа қиламиз. Сабаб, мактабимизда ўзбек тилининг чуқур ўргатилиши бўлса керак. Ўзбек тили ўқитувчиларимиз Давлатбека Ваисова, Норгул Бобожонова, Раъно Авазбоева бошчилигида йил давомида ўзбек тилида адабий кечалар ўтказилади. Бундай тадбирлар қалбимизда бу тилни ўрганишга бўлган иштиёқни янада орттиришга ёрдам берапти.

Жадира ЎЛМАСОВА,
Хўжайли туманидаги 69-ўрта мактабнинг
10-синф ўқувчиси.

ЗИЁРАТ

Мақтабимизда ҳар йили тарихий шаҳар ва обидаларни сайр қилиш анъана тусига кириб қолган. Биз ҳам синфимиз ўқувчилари билан тарихий шаҳарлар: Бухоро, Самарқанд, Хивага боришни режалаштирдик. Зиёратлар бизга ўтмишдаги бобокалонларимизнинг ҳаётлари билан тўла таянишиш учун имкон берди. Биз ҳақли равишда бундай обидалар билан фахрланамиз. Ахир, ўтмишни билмай, келажакни яратиб бўлмайди, дейишади-ку, тўғрими?

Гулноза ЖҰРАҚУЛОВА.



ҚУШЛАРГА МЕХРИБОНЛИК

Хар йили мактабимиз-
да “Қушлар байрами”
ўтказилади. Мактабимиз
ўқувчилари бу байрамга
алоҳида тайёргарлик кўри-
шади. Айниқса, ўқувчилар
уйларида боқаетган каптар-
лар, тўтиқушу қорақарға-
ларгача олиб келишади. Бу
куни мактабимиз “қушлар
бозори”га айланади. Мақ-
садимиз битта: жонивор-
ларни асраш ва уларга меҳ-
рибонлик қилишдир.

Шахноза ЖҲҲАҚУЛОВА,
Жиззах вилояти, Жиззах
туманидаги 12-мактаб
ўқувчилари.



ЁШ МУХБИРГА ЭСЛАТМА

Сен ўқишда, меҳнатда, интизомда ва жамоат ишларида бошқа ўқувчиларга ўрнак бўлишинг керак.

Газетага : мактаб ва синфнингдаги энг яхши ишларни, қизиқ воқеаларни, турли тўғаракларда ҳунар ўрганаётган ўртоқларнинг тўғрисида, дала-ларда, чорва фермала-рида ота- оналарига кўмаклашаётган тенг-дошларнинг ҳақида , ёш табиатшунослар, ўлка-севар саёҳатчилар, жон-куяр етакчилар, соғ юрак- тоғ юрак эканлигини англаб, спорт билан жиддий шуғулланаётган тенгдошла-ринг ва уларнинг ишлари ҳақида ёзиб юбор. Сен ва ўртоқларинг нималар ҳақида тортишасизлар, баҳслашасиз-лар. Бўш вақтларни қандай ўтказасиз-



лар. Шулар ҳақида ҳам ёз. Газетамизда чиққан мақолаларни синфдошларинг билан муҳокама қил. Улар ҳақида фикрингни, болаларнинг фикрини ёзиб юбор.

Бир мақолада ҳамма нарсалар ҳақида ёзма. Яхшиси бир фактни олиб, уни мукаммал ёритишга ҳаракат қил.

Камчиликлардан кўз юмма. Улар ҳақида дарров хабар қил. Лекин ёзишдан аввал унинг тўғрилигини текшир. Ўз деворий газетангнинг фаол муҳбири бўл.

Бизга хабар ёзганда сиёҳ билан равшан ва пухта ёз. Хат ёзганда қайси мактабда, нечанчи синфда ўқишингни, сен аъзо бўлган тўғарак номини, исм-фамилиянгни тўла кўрсат.


SOG'LOM AVELOD

«Sog'lom avlod» kirib keldi,
Bu yil mening elimga.
Baxt-saodat olib keldi,
Mening xur diyoringma.

**Yurtboshimiz omon bo'lsin,
Sog'lom avlod baxtiga.**

**Biz o'ylagan orzular,
Chiqaversin ro'yobga.**

**Vatanimiz mustaqil,
Sogʻlom tanda sogʻ aql.**



Nozima RAHIMOVA,
Zangiota tumanidagi
ning 3-sinf o'quvchisi

O'LKAM

Dunyoda o'lkalar ko'p,
Eng ko'rkami meniki.
Dunyoda millatlar ko'p,
Eng o'ktami meniki.

Dunyoda daholar ko'p,
Bebahosi meniki.
Dunyoda boyliklar ko'p,
Sof havosi meniki.

Bunday go'zal o'lkani,
Topolmaysan yo'ldoshim.
Shuning uchun yurarman,
Baland ko'tarib boshim.

*Maftuna
QO'CHQOROVA,
Toshkentdagi
179-maktabning
3-sinf o'quvchisi*

ОРЗУЛАР РҮЎБГА ЧИҚСИН

Синфимиз ўқувчилари На-
зирани ҳурмат қилишади. У
жуда ҳаракатчан қиз. Кела-
жақдаги орзуси журналист
бўлиш. Назиранинг газетада
мақоласи чиққанлиги ҳам бу-
нинг гувоҳидир. Тиниб-тинчи-
мас дугонаимизга очиги ҳава-
симиз келади. Албатта, ҳам-
мада орзунинг бўлгани яхши.
Менинг орзуим эса доришү-
нос бўлиш. Келажакда бу кас-
бим билан шифобахш дори-
лар тайёрлаб, халқ хизмати-
да бўлишни хоҳлайман.

Мамлакат АҲМЕДОВА,
Бухоро вилояти,
Ғиждувон туманидаги
8-мактабнинг 8-синф
ўқувчиси.

ҲАЙҶОТДЕК КУТУБХОНА

Зирапча

Яқинда Самарқанд вилоятининг Иштихон туманидаги бутун бошлиқ туман учун ягона бўлган Марказий кутубхонага кирдим. У ердан дастлаб ўзбек романчилигининг фахри бўлган “Ўткан кунлар”ни изладим. Аммо негадир топа олмадим. “Кеча ва кундуз”ни сўрадим. У ҳам йўқ. Шаҳидларни ёд этиб “Олтин зангламас”ни қидирдим. Топа олмайман. Эҳтимол, “Отамдан қолган далалар” бордир? Афсус, у ҳам йўқ! Кутубхонага янги китоб етиб келмаса, илгари нашр этилган китоблар бордир, дея “Қутлуғ қон”ни сўраб ҳам... тополмадим.

Балки бу асарлар китобхонлар кўлида талаш бўлиб ўқиладигандир, деган умидда ҳар гал кириб сўрайвердим. Бироқ, садо чиқмади. Кейин билсам, кутубхонага истиқлолга оид янги китоблар, турли сайланмалар, "Ўткан кунлар"дек шоҳ асарлар умуман келган эмас экан. Жавонлардаги китобларнинг анчайин эскириб кетганигини кўриб мен шунга ишонч ҳосил қилдим. Замонанинг зайли билан яна бир тадбиркорликмикан, "Шайтанат"дек китобни катта пул сарфлаб, бозордан олиб ўқиб чиқ-

Хайҳотдек кутубхона ёнгинамизда қад кўтариб турса-ю, у ерга китобхон ўқувчилар учиб-қўниб кирса-ю, умидлари сўниб, қанотлари қайрилиб қайтиб чиқса, бунга нима дейиш мумкин? Ахир миллатнинг келажаги китобхон бўлиши учун қайгурадиганлар бордир, туманда?..

Нодира АМИРОВА,
Алишер Навоий номидаги Нафис санъат лицейининг
10-синф ўқувчиси.

ЯНГИ МАКТАБ ОРЗУСИДА

Биз Тошкент вилояти, Тошкент туманидаги Фулом Маҳмуд Абдуллаев жамоа ҳўжалигига қарашли 21-таянч мактабида ўқиймиз. Биз ҳам бошқалар қатори мактабимизни, таълим берадиган устозларимизни сева-миз, аммо... Мактабимиз хоналари тор ва кам: Лаборатория хонаси йўқ, жисмоний тарбия дарсини мактаб ҳовлисида ўта-миз. Хонаси йўқлиги туфайли спорт билан шугуллана олма-миз. Тўғарақлар учун бўш хоналар ҳам, меҳнат хонаси ҳам йўқ. Қизлар меҳнат дарслигидан пишириқ пи-ширадиган бўлса, уйма-уй масаллиқларини ташиб юришади. Шароит йўқлиги туфайли ҳатто сув ичгани уйимизга бориб кела-миз. Илгари бу мактабда ота-оналаримиз ҳам ўқишган. Сўнгра болалар боғчаси бўлган. Болалар боғчасига янги бино қурил-гач, улар ўша бинога кўчиб ўтишди. Боғча яна мактабга айлан-ди. Газ олиб ташланган, аммо унинг труба-си олинмаган. Ундан газ ҳиди анқиб туради. Қиш кунлари синф хоналари яхши исима-ди. Ўқувчилар кийимлари билан дарсда ўтира-дилар.

Янги мактаб қуриб берамиз, деб ваъда беришганига қарийиб 3-4 йил бўлган бўлса ҳам, ҳалигача ҳеч қандай ҳаракат йўқ. Биз эса замонавий мактабда тўлиқ билим олишни хоҳлаймиз. Мактабимиз ҳақида Тошкент тумани ҳокими Б. Олимова, жамоа ҳўжалиги раҳбари И. Маҳкамовага ҳам маълум қилсангиз. Агар мақолаамиз «Тонг юлдузи» саҳифаларида ёритилса, мактабимиз шароити ижобий томонга ўзгаради, деган умиддамиз.

Равшаной СУЛАЙМОНОВА,
Тошкент туманидаги 21-таърих мактабининг
7-«А» синф ўқувчилари номидан.

Бугун сўнгги кўнғироқ чалинди. Мактабнинг энг сўнгги кўнғироғи... У сизни мактаб кучоғидан олис-олисларга олиб кетади. Сиз энди ўқувчи эмассиз. Мустақил инсонсиз. Сизни ҳаяжон босяпти. Кўксингизда юрак гуп-гуп уряпти. Эҳтимол, юрагингиз ҳеч қачон бугунгидек шиддатли урмагандир... Нурли манзиллар кутяпти сизни. Бу йўлда синовлар турибди. Бу йўлда юрмоқлик осон эмас. Ортингизда устозларингиз, сизни улғайтирган мактаб ва умрингизнинг энг гўзал лаҳзалари бўлган ширин хотиралар қоляпти. Сиз ҳали уларни кўп бора соғинасиз. Бир лаҳза, атиги бир лаҳза бўлсин, мактаб бағрига қайтгингиз келади, лекин қайтолмайсиз. Орқага қарашга ҳам имкон бермайди ҳаёт... У сизнинг эркалингизни кўтармайди. У сизнинг устозларингиз каби сизга марта урушгани учун виждони қийналиб юрмайди... Сизни фарзандлари каби асраб-авайламайди у. Чунки у ўз номи билан ҳаёт. Сиз атрофга аланглайсиз. Ҳаммаёқ гавжум. Қайсидир синфдошингиз арзимаган шўхлиги учун устозидан узр сўраяпти. Сиз сочини тортқилаб ҳоли-жонига қўймаган синфдош қизингиз кўзидан ёш томчилаяпти. Дўстларингиз бир-бирини кутлаяпти. Сира ишонгингиз келмайди: наҳотки, сиз улғайиб қолдингиз. Аввалги шўхликлар, дарслардан қочишлар қаерда? Қани улар? Атрофга қарайсиз. Ҳеч нарса ўзгармаган. Ўша мактаб, ўша дарвоза, ўша устозлар. Лекин сиз ўзгардингиз. Энди сиз ўқувчи эмассиз. Ўн йил ўқидингиз сиз бу мактабда. Эҳтимол,

СЎНГГИ ВА БИРИНЧИ КЎНҒИРОҚ



унинг кўнғироқлари меъдангизга теккандир. Лекин бу кўнғироқ сизга қадрли. Қаерда ва ким бўлманг, бу кўнғироқ сизни бир лаҳза бўлсин тарк этмайди. Сиз ҳали уни кўп бор соғинасиз. Кун келиб мактаб остонасидан ўтганингизда сизни ҳеч ким ўқувчидек кутиб олмайди. Энди сиз эмас, сизга салом беришади. Сиз фақат алиқ оласиз. Чунки сиз ўқувчи эмасиз.

Бугун сўнгги кўнғироқни ҳаяжон билан

кутаётган, қўлида етуклик гувоҳнома билан уйга чопқиллаб кетаётган битирувчи!

Сизга ҳавасим келади. Сиз ойдин орзулар қуршовида турибсиз. Сиз катта йўлнинг бошида турибсиз. Мактабнинг сўнгги кўнғироғи - ҳаётнинг биринчи кўнғироғидир. Сўнгги ва биринчи кўнғироқ... Дунё кутиш ва кузатишдан иборат дегани балки шудир.

Қаранг, ўн йил ўтибди-я орадан. Ўн йил... Қанча-қанча сувлар оқиб кетди бу йиллар ичида. Кечагина менга алифбони ўргатган ўқитувчим бугун ҳавас билан набирасига исмимни қўйибди. Бугун мактабга боришга юрагим бетламайди. Энди у ердан синфдошларни тополмайман. Ширин хотиралар қуршаб олади мени. Бу хотиралар ҳақида, умрингнинг энг гўзал лаҳзалари ҳақида ёзиш осон эмас...

Бугун мен каби сиз ҳам ўқувчи эмассиз. Демак, бизнинг йўлимиз, маслак ва мақсадимиз бир! Ўзбекистон бизни кутаяпти. Нурли манзиллар кутяпти бизни. Буюк келажакни барпо этамиз биз. Инсонни улуғлаймиз биз.

Карвон олис йўлга чиқаяпти. Бу карвон манзилга етадими, йўқми бу бизга боғлиқ. Бизнинг бахтимиз, тақдиримиз - ана шу карвон. У манзилга етиши керак. Орқага қайтиш мумкин эмас. Орқага қарашга ҳам имкон бермайди ҳаёт.


Хайр, мактаб!

Ассалом, келажак!

Шухрат ОРИФ

БОЛАЛИКНИМ ҚОЛДИ ОРТЛИМДА

Инсон ҳаётининг энг ширин дамлари мактабдан бошланади. Эсимизни эндигина таниганимизда мактабга қадам қўямиз ва шу ерда билим оламиз, умримизнинг ўн йилини ўтказамиз.



Унга ўз уйимиздай ўрганиб қолганимизда уни тарк этамиз.

Мана бугун биз ҳам мактабимизнинг навбатдаги қалдирғочлари бўлиб учиб кетмоқдамиз. Мактабда ўтказган қувончли кунлар, имтиҳон ҳаяжонлари-ю синфдошлар билан чуғурлашиб туришлар, кўнғироқ чалиниши билан бошланадиган шовқин-суронлар каби шўх болалик онлари хотирамизда абадий муҳрланиб қолади.

Болаликдай беғубор онлар,

Қайтмас энди ўтса ҳам йиллар.

Ширин тушдан уйғонган каби

Ҳаяжонда қовирилар диллар...

Салом, мустақил ҳаёт!

Марғуба СИДДИҚОВА,

Шайхонтоҳур тумани,

59-мактаб,

11-синф ўқувчиси.

Кўнғироқ, кўнғироғим... Ҳар сафар овозингизни эшитганимда қалбим ларзага келади.


Мана, сенинг сўнгги бор овозингизни эшитганимга ҳам бир йил бўлди. Мактабни, ўқувчилик дамларимни қанчалик соғинганимни билсанг эди... Ўша онларимни эсласам хаёллар уммонига ғарқ бўламан. Кўнғироғим, сенга дўстларим билан ҳафлашиб қолган дамларимни, ёзма ишларда бир-биримиздан кўчиришларимизни, баъзида устозларимиз билан келишолмай қолганларимизни соғиниб-соғиниб сўзлаб бергим келади. Ҳа, ўша дамлар ҳеч қачон эсимдан чиқмайди.

Бугун 25 май, яна сўнгги кўнғироқ садолари жаранглайди. Битирувчилар кучоқ-кучоқ гулларини устозларига тақдим этадилар. Хаёлларида эса тезроқ мактаб билан хайрлашиб, ўзлари орзу қилган илм ва ҳунар гўшаларига ошиқадилар. Аммо, вақт ўтиши билан улар албатта мактабни, қадрдон гўшаларини соғинадилар.

Мен ҳам бу йилги битирувчиларга омад тилайман. Истардимки, эндигина мустақил ҳаётга қадам қўяётган укажонларим давлатимизга фидойи, етук инсонлар бўлиб етишишсин.

Шаҳло МУТАЛОВА,

ТошДУ талабаси.



Сўнгги кўнғироққа ҳам саноқли кунлар қолганда ўқувчилар "Таътилдаги орзулар" номли иншо ёзишга қарор қилишди. Синфга сокинлик чўкди. Бошқа пайт ҳамма бир-бирдан кўчирарди. Бугун эса барча ўз орзуларини иншода мужассамлаштиришга, уни чиройли ёзишга ҳаракат қилди. Айрим ўқувчилар "Яхши дам - меҳнатга ҳамдам" шиорига амал қилган ҳолда оромгоҳда мазза қилиб дам олишни ёзса, айримлари таътилни сайру саёҳатда ўтказишни ёзарди.

Ўқувчилар орасида Анварнинг ёзган иншоси ўзгача эди. У иншо ёзиш билан бирга дафтарига ажойиб уйлар қад кўтарган кўркем шаҳарни ва қувноқ болаларнинг расмини чизган эди. Расмдаги ранглар бир-бири билан шунчалар уйғунлашгандики, ўқитувчи ҳам уни кўриб маҳлиё бўлиб қолди. Анвар иншо сўнггида: "Мен таътилда "Моҳир қўллар" тўғарагига қатнашиб, келгусида буюк рассом бўламан. Бугун дунёни сайр қилиб, гўзал расмлар чизаман", - деб ёзиб қўйди. Барча Анварнинг орзусига ҳавас қилди. Улар ҳам таътилда бекор юрмай, бирор бир тўғаракка қатнашишга аҳд қилишди. Мен ҳам...

Наргиза РИХСИБОВА,

Тошкент вилояти,

Зангиота туманидаги 3-мактабнинг

7-синф ўқувчиси.

«ИҚТИСОДИЁТДАН САБОҚЛАР»

Тошкент шаҳри, 2000 йил, 1 май куни «Иқтисодиётдан сабоқлар» сиртқи мактаб танловига якун ясалди. Унда Г.Я. Алимова, У.Абдуазимова, Н.Субхонов, Э.Сариков, Б.Хайдаров, У.Хомутов, З.Асадова, М.Пирматов, Н.Хўжаевлардан иборат тахрир ҳайати аъзолари этиборни танлов ғолибларини аниқлашга қаратдилар.

Ҳакамлар ҳайъати раиси Н.Хўжаев 1999-2000 ўқув йили давомида ўқувчиларнинг юборган мактублари синчиклаб ўрганилгани, якуний босқичда таклиф қилинган ёзма ишлар текширилгани, ўқувчиларнинг танловга қатнашиши баҳолангани ва қуйидаги якуний натижалар чиқарилгани ҳақида айтиб ўтди.

Якуний натижалар жадвалини тўлиқ илова қиламиз.

Қарор қилинди:

1. ЯКУНИЙ НАТИЖАГА ҚўРА, ТАНЛОВ ҒОЛИБИ ДЕБ, ФАРҒОНА ВИЛОЯТИ, БАҒДОД ТУМАНИ ИҚТИСОДИЙ ГИМНАЗИЯ МАКТАБНИНГ 6-СИНФ ЎҚУВЧИСИ РАҲИМОВ ТўЛҚИНЖОН ТОПИЛСИН, 1- ДАРАЖАЛИ ДИПЛОМ ВА ТЕЛЕВИЗОР БИЛАН ТАҚДИРЛАНСИН.

2. ИККИНЧИ ЎРИНГА ЛОЙИҚ ДЕБ, САМАРҚАНД ВИЛОЯТИ, ПАХТАЧИ ТУМАНИ 15- МАКТАБНИНГ 7- СИНФ ЎҚУВЧИСИ ЖўРАЕВ ЖАСУР ТОПИЛСИН, 2- ДАРАЖАЛИ ДИПЛОМ ВА СТЕРЕО МАГНИТОФОН БИЛАН ТАҚДИРЛАНСИН.

3. ҚУЙИДАГИ ЎҚУВЧИЛАР 3-ЎРИНГА ЛОЙИҚ ДЕБ ТОПИЛДИ, 3-ДАРАЖАЛИ ДИПЛОМ ВА АУДИОПЛЕЕРЛАР БИЛАН ТАҚДИРЛАНСИНЛАР.

1) Умарова Шахло - Жиззах шаҳари, 15-мактаб, 7-синф.

2) Мансурова Камола - Қарши шаҳари, 35-мактаб, 6-синф.

3) Сулаймонов Ҳабибулло - Фарғона вилояти, Қўқон туманидаги иқтисодий мактаб интернат.

4) Сандхўжаев Баҳодир - Тошкент шаҳари, солиқ лицейи, 11-синф.

5) Масалиев Ислоҳ - ЎзМУ қошидаги гимназия, 11-синф.

6) Боймуҳамедов Абдулла - Сурхондарё вилояти, Узун туманидаги 3-гимназия, 5-синф.

7) Ортиқов Азаматжон - Андижон вилояти, Қорасув шаҳари, 19-мактаб-интернат, 8-синф.

8) Жумаев Шавкат - Навоий вилояти, Қизилтепа туманидаги 18-мактаб.

9) Халаяов Ином - Бухоро вилояти, Жондор туманидаги иқтидорли болалар мактаб-интернати.

10) Эшонқулов Бобомурод - Тошкент шаҳари, солиқ лицейи 11-синф.

4. ҚУЙИДАГИ ЎҚУВЧИЛАР РАҒБАТЛАНТИРУВЧИ СОВҒАЛАР БИЛАН МУКОФОТЛАНСИН.

1) Сағдиев Маҳмуд - Тошкент шаҳари, солиқ лицейи.

2) Раҳимов Абдуманноп - Сурхондарё вилояти, Узун туманидаги 3- гимназия.

3) Элмуродова Д. - Қашқадарё

СИРТҚИ МАКТАБ ТАНЛОВИНИНГ ЯКУНИ

Нихоят - кўтилган кун етиб келди. Олимпиада ва имтиҳон учун ота-она ёки устозлар ҳай-ҳайи билан тайёрланган болалар ўз хоҳиши ва истаклари билан биз эълон қилган топшириқларни бажариб, саволларимизга берган жавоблари асосида баҳоларини олиб.. совға ва саломларга эга бўлдилар. Очиги, шундай сиртқи синовларни тез-тез ўтказиб туриш фойдадан ҳоли эмаслигига амин бўлдик. Колаверса, савобталаб тadbиркорлар юртга ош бериб ёки данғиллама ховли-жой қуриб олган раҳматидан болалар билимини синаб, баҳосига қараб телевизор, магнитофон, чанг ютгичу кир ювгичлар совға қилса оламшумул воқеа бўлар экан! Икки йиллик тажриба шунни кўрсатди.

Ота-оналар вилоятлардан ўз ҳисоблари бўйича машина, ҳатто болалар соғ-омон бориб-келиши учун шифокорлар ҳам ёллаб, Тошкентга келдилар ва фарзандларининг билим даражасини билдилар. Йигилган 400 га яқин ота-она ва иқтисодчи бўламан, деган тенгдошларингиз нафақат эълон қилинган, балки ундан ортиқ совғаларни ҳам олдилар. Чунки иқтисод фанини ривожлантиришга ҳисса қўшаётганидан хурсанд тadbиркор Эргашовой Сариков ва жонқуяр Баҳодир Хайдаровлар 5-10 та телевизору магнитофонларни шунчаки ўйинлар асосида болаларга совға қилиб юборди. Демак, совға эртанги илмга, имкониятга ишончдир!

вилояти, Қарши шаҳари, 35- мактаб.

4) Аҳмедов Отабек - Тошкент шаҳари, солиқ лицейи.

5) Кенжаев Азиз - Тошкент шаҳари, солиқ лицейи.

6) Ражабова Гулноза - Қашқадарё вилояти, Қарши шаҳари, 35-мактаб.

7) Умарова Раъно - Жиззах шаҳари, 15- мактаб, 6-синф.

8) Каримов Шерзод - Андижон вилояти, Қорасув шаҳари, 19-лицей-интернат, 11-синф.

9) Давлатов Собир - Бухоро вилояти, Қорақўл туманидаги 164-иқтисослашган лицей 10- синф.

10) Раҳматов Шоятбек - Андижон вилояти, Қорасув шаҳари, 19-лицей-интернат, 7-синф.

5. НАЗАРИЙ КОНФЕРЕНЦИЯДА ҚУЙИДАГИ ЎҚУВЧИЛАР ҒОЛИБ ДЕБ ТОПИЛСИН, МАҚТОВ ЁРЛИҒИ ВА СОВҒАЛАР БИЛАН ТАҚДИРЛАНСИН.

1) Муртазаева Раъно - Қашқадарё вилояти, Қарши шаҳари, 35-мактаб.

2) Эгамбердиева Бўритош - Навоий вилояти, Хатирчи туманидаги 22-мактаб.

3) Эшназаров Фаррух - Шаҳрисабз шаҳар, 3- лицей-интернат.

4) Эшбоева Дилшода - Сурхондарё вилояти, Узун туманидаги 3-мактаб.

5) Бекназарова Феруза - Қирғизстон Республикаси, Жалолобод вилояти, Сузоқ туманидаги «Сотволди-Ҳожи» мактаби.

6. БИЗНЕС РЕЖАЛАР ТАНЛОВИДА ҚУЙИДАГИ ЎҚУВЧИЛАР ҒОЛИБ ДЕБ ТОПИЛСИН. МАҚТОВ ЁРЛИҒИ ВА СОВҒАЛАР БИЛАН ТАҚДИРЛАНСИН.

1) Зухуров Руслан - Бухоро вилояти, Бухоро туманидаги 1-мактаб.

2) Мирзаев Шухрат - Навоий вилояти, Хатирчи туманидаги 74-мактаб.

3) Турдиев Беҳзод - Навоий вилояти, Хатирчи туманидаги 22-мактаб.

4) Жўраев Жасур - Самарқанд вилояти, Пахтачи туманидаги 15-мактаб.

5) Бектемиров Беҳзод - Сирдарё вилояти, Сирдарё туманидаги 3-мактаб.

6) Ражабова Гулноза - Қашқадарё вилояти, Қарши шаҳари, 35-

мактаб.

7) Султонов Фаррух - Қашқадарё вилояти, Шаҳрисабз, 3-лицей-интернат.

8) Нурбоев Дилшод - Андижон вилояти, Қорасув шаҳари, 19-мактаб.

9) Бердиев Жўрабек - Навоий вилояти.

7. РЕКЛАМАЛАР ТАНЛОВДА ҚУЙИДАГИ ЎҚУВЧИЛАР ҒОЛИБ ДЕБ ТОПИЛСИН, МАҚТОВ ЁРЛИҒИ ВА СОВҒАЛАР БИЛАН ТАҚДИРЛАНСИН.

1) Ёшиева Камола - Бухоро вилояти, Вобкент тумани. Реклама мавзуси - «Зардўзлик».

2) Жўраев Жасур - Самарқанд вилояти, Пахтачи тумани. Реклама мавзуси- «Самарқанд нони».

3) Рустамов Умид - Навоий вилояти, Нурота туманидаги 1- гимназия.

8. ИҚТИСОДИЙ ВИКТОРИНАДА ҚУЙИДАГИ ЎҚУВЧИЛАР ҒОЛИБ ДЕБ ТОПИЛСИН ВА СОВҒАЛАР БИЛАН ТАҚДИРЛАНСИН.

Сариқов Шамшод, Бекназарова, Шокиров, Хониакулов, Шодмонов, Зухуров, Ҳамраев, Мансуров, Раҳимов, Қудратиллаев.

9. ТАНЛОВДА ЎҚУВЧИЛАРИ ФАОЛ ҚАТНАШГАН ҚУЙИДАГИ ЎҚИТУВЧИЛАР ФАХРИЙ ЁРЛИҚ ВА СОВҒАЛАР БИЛАН ТАҚДИРЛАНСИН.

1) Раҳматова Зебо - Навоий вилояти, Нурота туманидаги 2-мактаб.

2) Салимова М. - Бухоро вилояти, Вобкент туманидаги 1-мактаб.

3) Раҳмонов М. - Навоий вилояти, Хатирчи туманидаги 74-мактаб.



4) Маматқосимов Т. - Наманган вилояти, Чортоқ туманидаги 31-мактаб.

5) Пиримбердиев Ф. - Жалолобод вилояти, Сузоқ туманидаги «Сотволди-Ҳожи» мактаби.

6) Иляшова Д. - Жиззах вилояти, Бахмал туманидаги 33-мактаб.

7) Шодмонов А. - Жиззах вилояти, Жиззах шаҳари, 15-мактаб.

8) Раҳимов Ш. - Қашқадарё вилояти, Шаҳрисабз шаҳари, 3-мактаб-лицей.

9) Чориева П. - Сурхондарё вилояти, Узун туманидаги 3-мактаб.

10) Эшмуродова Х. - Қашқадарё вилояти, Қарши шаҳари, 35-мактаб.

11) Абдужаппорова К. - Андижон вилояти, Қорасув шаҳари, 19-мактаб-лицей.

12) Каримов Э. - Фарғона вилояти, Боғдод туманидаги иқтисодий гимназия.

13) Ражабова М. - Навоий вилояти, Хатирчи туманидаги 22-мактаб.

10. ТАНЛОВДА ЎҚУВЧИЛАРИ ФАОЛ ҚАТНАШГАН ҚУЙИДАГИ МАКТАБЛАР ДИПЛОМЛАР БИЛАН ТАҚДИРЛАНСИН.

1) Андижон вилояти, Қорасув, 19-мактаб.

2) Жалолобод вилояти, Сузоқ туманидаги «Сотволди-Ҳожи» хусусий мактаб.

3) Навоий вилояти, Хатирчи тумани, 22-мактаб.

4) Қашқадарё вилояти, Қарши шаҳар, 35-мактаб.

5) Қашқадарё вилояти, Шаҳрисабз шаҳар, 3-мактаб-интернат.

6) Жиззах вилояти, Жиззах шаҳари, 15- мактаб.

7) Тошкент молия институти қошидаги солиқ лицейи.

8) Ўзбекистон миллий университети қошидаги гимназия.

9) Наманган вилояти, Чортоқ туманидаги 31-мактаб.

10) Фарғона вилояти, Боғдод туманидаги иқтисодий гимназия.

11) Сурхондарё вилояти, Узун туманидаги 3-гимназия.

12) Хоразм вилояти, Шовот туманидаги 28-мактаб.

Еш иқтисотчилар ўз ҳаёлий-рекламаларини ҳам тақдим қилдилар. Газетамизнинг 5-6 саҳифаларида болалар тайёрлаб келган орзу ва режалари баёни - РЕКЛАМАЛАРИНИ эълон қиламиз.

РЕКЛАМА

-Бола: Вой белим-ей, вой белим.

-Бобо: Ҳа, ўғлим, нима гап?

-Бола: Ҳе, бобожон, белим оғри-япти, уколдан ҳам безидим.

-Бобо: Менга қара, болам. Ким айтиди, мени 77 ёшга кирган деб.

-Бола: Бунинг боиси нима, бобожон?

-Бобо: Мен асалчи эдим, энди касбу коримни неварамга топширдим.

Асал есанг, дардингга дармон бўлади.

ди. А, лаббай Жўрабек болам!

-Жўрабек: Шундай, бобожон.

Бизнинг асал тотлидир,

Бўлар минг дардга даво.

Ҳатто шифокор ўзи,

Асалдан топган даво.

Агарда есанг асал, бўлмайсан ҳеч касал!

«Жўрабек» асаларичилик фермер хўжалиги, Навоий вилояти, Қизилтепа тумани, Варозун жам хўжалиги.



САРМОЯСИЗ ДАРОМАД ҚИЛИШ



Мамлакатимиз Президентини хусусий тадбиркорликни ривожлантириш борасида жуда катта им-

кониятлар яратди.

Менимча, ҳақиқий тадбиркор тайёр маблағлардан қандай фойдаланишни эмас, шу маблағни ўзи топиб, кейин фойдаланишни билиши керак. Мен шу фикрда 2000 - 2002 йиллар учун сармоясиз даромад қилишнинг йўлини белгиладим. Бунинг учун:

1. Дадамдан 0.02 гектар, яъни 10 м х 20 м томорқадан ер сўраб оламан.

2. Эрта баҳордан уй олдида

ўсаётган тераклардан қаламча тайёрлайман.

Қаламчаларни ерга экаман.

Бўш вақтимда қаламчаларни парвариш қиламан.

Қаламчалар 1 ёш ва 2 ёшли бўлганда бозорда сотаман.



БИЗНЕС РЕЖА

№	фаолиятнинг мазмуни	даромад сўм	ҳаражат сўм	фойда сўм
1	Қаламчалар тайёрлаш ва ерга экиш 40 см.га жуяк очиб, 10 м.га 25 жуяк, ҳар жуякка 100та қаламча, жаъми 5000дона қаламча	-	-	-
2	Қаламчаларни парваришлаш	-	-	-
3	Бир ёшли қаламчаларни сотиш 3 минг дона. Ҳар бири 30 сўмдан	90000	-	90.000
4	Қолган 2000 донасини 2 ёшгача парваришлаш ва 1500 донасини сотиш. Донаси 70 сўмдан. 1500 х 70 = 105000	105000	-	105000
5	500 дона терак қаламчаси турли сабаблар билан шикастланди.	-	-	-
6	Қишлоқдаги ер солиғи 0.01 гектарга 98 сўм, 2 йилга		196	
	Жаъми	195000	196	194804

Ҳеч қандай сармоясиз, узоғи билан икки йилда 194804 сўм даромад қилиш мумкин. Мен мактаб ўқувчиси бўлганим учун даромад солиғи тўламайман.

Илёс ХОЛДОРОВ, Фарғона вилояти, Бағдод туманидаги иқтисодий гимназиянинг 8-синф ўқувчиси.

Мен ўзимнинг бизнес лойиҳамни мактаб ўқувчилари учун форма тикиш цехини очишга асослаиб туздим. Бу бизнес лойиҳани Жиззах шаҳрида амалга оширмоқчиман. Ҳозирги кунда қайси мактабга бормайлик, ҳамма ўқувчиларнинг эғнида Европадан келтирилган кийимлар. Айниқса қизларимиз ўзимизнинг миллий кийимларимизни унутишмоқда. Миллий кийим деганда фақат атлас кўйлак эмас, балки бошқа хил матолардан ҳам кўйлаклар тикиш мумкин. Менимча, ўқувчилар учун формалар тикишга шойи матолар тўғри келади, деб ўйлайман. Юқорида айтиб ўтганимдек, мен қизлар учун форма ва фартук тикув цехи очмоқчиман. Албатта, бунинг учун маблағ керак. Шу сабабли мен тадбиркорлик ишини бошлаш учун 500000 (беш юз минг) сўм бир йилга 15 фоиз имтиёзли қарз оламан. Цех очиш учун аввало дилаъзоларимизга мурожаат қилиб, уларнинг ва мактаб иқтисод ўқитувчиси Анорқул аканинг ўзим ташкил этаётган кичик фирмани, яъни цех фаолиятини юрғатиш учун маслаҳатлар

КИЧИК ТИКУВ ЦЕХИДА МАКТАБ ФОРМАСИ ТИКИШНИ ЙЎЛГА ҚЎЙИШ

сўрадим. Оила аъзоларимиз билан келишиб, бу ишни ўз уйимизда амалга ошираман. Ишни керакли асбоб ускуналар - дастгоҳларни сотиб олишдан бошлайман. Фирмамиз кичкина бўлгани учун, биринчидан бир қисмини қуйидагиларга ишлатаман:

1. Иккита тикув машинаси.

2. Битта оверлок машичаси.

3. Матолар, ип, игна, қайчи ва бошқа керакли хом ашёларни сотиб оламан. Бунга кетган сарф-ҳаражатлар иккита тикув дастгоҳи: ҳар бири ўн беш минг сўмдан ўттиз минг сўм, битта оверлок машинаси ўн саккиз минг сўм, тадбиркорликни бошлашим учун асосий хом ашё ҳар хил матолар ва безак турлари учун 350000 (уч юз эллик минг) сўм сарф қиламан. Қайчи, игна, ип ва бошқа майда нарсалар учун беш минг сўм сарфлайман. Хом ашё ва керакли дастгоҳларнинг ҳаммаси етарли, лекин уни ишлатиш учун ишчи кучи зарур бўлади. Бунинг учун яхши ўз ишининг устаси, моҳир кўлли ти-

кувчи ва бичувчи қизларни топиб ишга оламан. Мутахассисларни узоқдан қидириб ўтирмайман, чунки оиламизда аёллар - онам ва опаларим бор. Онаминг касби тикувчи, опам ҳам тикувчилик курсини битирган. Мен ҳам тикувчилик тўғараги аъзосиман. Бундан ташқари синфимизда ўқийдиган қизлар орасида тикувчилик касбини танлаган қизларимиз ҳам бор. Мен ўша қизларни мана шунга жалб қиламан. Уларга тўланадиган ҳақларни фирмамга тушадиган фойдадан тўлайман. Бозорда қизлар учун тикилаётган формаларнинг кўпи бир хил ўлчовда. Биз эса уларни ҳар хил ўлчовда бичиб, тикамиз. Битта формага кетадиган ҳаражатлар 1-жадвалда аке эттирилган. Бугунги кунда бозор иқтисодиёти даврида битта мактаб формасининг нархи 2500 (икки минг беш юз) сўм атрофида туради. Биз эса 1800 (бир минг саккиз юз) сўмдан улгуржи нархда сотувга берамиз.

1800 - 1083,5 = 716,5 сўм

Демак, битта формадан келади-

ган фойда етти юз ўн олти сўм эллик тийинни ташкил этади. Бундан ҳар бир кўйлак учун юз сўм иш ҳақи, солиқ учун 20 (йигирма) фоиз 143,3 (бир юз қирқ уч сўм ўттиз тийин) амортизация ажратмаси 20 (йигирма) фоиз 143 сўм 30 тийин. Жаъми ҳаражатлар - 386 сўм 60 тийин.

716,5 - 386,6 = 329,9 сўм соф фойда.

Тахминан рентабеллик 45 фоизни ташкил қилади.

1800 - 1470 = 330 сўм соф фойда.

Нигора ТҲҲИЕВА,
Жиззах шаҳри Э. Содиқов
номли 15- ўрта мактабнинг
10 - «А» синф ўқувчиси.



Мен ўртоқларим билан тадбиркорлик фаолиятини бошладим. Балиққа қизиқишимга сабаб ёшлигимдан аквариумда балиқ боққаним бўлди. Хаёлан аквариумни кенгайтириб, катта миқдорда сунъий кўллар ҳосил қилиб кўрдим. Фикрларимни уйдагилар маъқуллашди. Аввало, Нишон туманидаги 8- жамоа хўжалигида ташкил этилган балиқчилик билан шуғулланувчи

МЕН ТАДБИРКОР БЎЛГАНИМДА

ташкilotта бориб, олти ой иш ўргандим. Энди маҳалла атрофидан 1 гектар ерни жамоа хўжалигидан 10 йилга ижарага оламан. Сунъий кўл ҳосил қилиш учун 800000 сўм банкдан қарз оламан. 100000 сўмга балиқ боқадиган корхонадан 500 дона балиқ сотиб оламан. 100000 сўмга ем, витамин

оламан. 200000 сўмни электр ҳақи, газ ва бошқа ҳаражатларга ишлатаман. 400000 сўмни ер учун тўлаб тураман. Балиқлар бир йилда бир марта кўпаяди. Бир она балиқ 300 тухум кўяди.

Демак 500 таси 150000 та тухум кўяди. Балиқлар катта бўлганидан сўнг, уларни балиқдан ҳар хил озиқ-овқатлар ишлаб чиқарилади-

ган корхонага бир килограммини 700 сўмдан сотаман. Корхона менга 1050000 сўм пул беради. 1000000 сўмини банкка бераман. 50000 сўм ўзимга қолади. 50000 сўмга яна балиқ сотиб оламан ва ишимни давом эттираман.

Фарҳод ЭГАМБЕРДИЕВ,
Қарши шаҳар,
35-мактабнинг
6-синф ўқувчиси.

«BAHMAL SHAROB» - «PRAHA BAHMAL», «MEVA SABZAVOTNI QAYTA ISHLASH» - XINDISTON, «DON MAHSULOTI» - Rossiya, tosh uyimakorligi, marmar cexlari shular jumlasiga kiradi. Mening uz yortimga qushgan hissamdan biri - bu Bahmalda «Bahmal gilaми» хусусий корхонани очишимдир. Корхонани очишдан мақсад юртimga ва унинг иқтисодиётини оширишга ҳисса қўшиш, ишсизлар сонини камайтириш, давлат бюджетига валюта маблағини ошириш, халқимизга сифатли товар маҳсулотларини етказишдир.

Бахмал иқтисодиётида ўзига хос ўрин тутган корхоналардан бири «Бахмал шароб» - «Прага Бахмал», «Мева сабзавотни қайта ишлаш» - Ҳиндистон, «Дон маҳсулоти» - Россия, тош ўймакорлиги, мрамар цехлари шулар жумласига кирadi. Менинг ўз юртimgа қўшган ҳиссамдан бири - бу Бахмалда «Бахмал гилами» хусусий корхонани очишимдир. Корхонани очишдан мақсад юртimga ва унинг иқтисодиётини оширишга ҳисса қўшиш, ишсизлар сонини камайтириш, давлат бюджетига валюта маблағини ошириш, халқимизга сифатли товар маҳсулотларини етказишдир.

Ҳар бир хусусий корхона очув-

чининг олдида турган муаммолардан бири - пул маблағи топишдир. Мен ўзим тежаб юрган пул маблағимдан минг сўмга сифатли кўй жунини - 10 кг. жун, 750 сўмга пахта ипи - 10 кг (75 сўмдан), 600 сўмга арқон ипи - 10 кг (60 сўмдан), ранг бўёқлари - 1000 сўмга (хилига қараб) = жамми сўм 1000 + 600 + 1000 + 750 = 3350 сўм сарф қилиб юқорида кўрсатилган хом ашёларни сотиб оламан. Корхона куриш учун сифатли 7 та арча ва қайрағоч дарахтларини топаман. Корхонага тўртта ишчи - гилам тўқиш бўйича мутахассисни жалб қиламан. Бир ойда корхонада иккита гилам ишлаб чиқарилади. Ҳар бир гиламнинг

бозордаги нархи сифатига қараб 15.000 сўмдан 20.000 сўмгача со-тилади. Бир ойда корхона 36000 сўм даромад қилади. 3350 сўм гилам маҳсулотига, 1000 сўм ҳаражатларга (электр токи, ижара ҳақи), 2000 сўм давлат бюджетига мажбурий тўлов, ишчиларнинг ойлик маоши ҳар бирига 4000 сўмдан 16000 сўм сарфланса, = 3350 + 1000 + 2000 + 16000 = 22350 сўмни ташкил қилади. Иккита сотилган гиламнинг ўрта нархи 36000 сўм. 36000 - 22350 = 3650

Фойда кам, лекин мен қўлда тўқилган гиламни корхонанинг иши бир-икки ой яхши ривожланиши учун арзон нархда сотдим. Чунки ҳозирги бозор иқтисодиётида рақобат кучли



бўлган даврда харидорни ўзимга қаратишнинг бирдан бир йўли - товарни арзон сотишдир.

Акмал МЕЛИБОЕВ,
Бозорбой УМАРОВ,
Жасурбек САИДОВ,
Жиззах вилояти, Бахмал тумани, 33- мактабнинг 8-«А» синф ўқувчилари.

Албатта, олиш мумкин. Бунинг учун кунт, ҳафсала керак ҳолос! Баъзан телевизорда, радиода бир неча ўн гектар ер олиб миришкорлик қилаётган одамларни эшитиб, ҳайрон қоламан. Бундай ишлаш учун вақт ва ҳаражат ҳам кўп керак бўлади. Биз оила аъзоларимиз: адам, аям, синглим ва укам билан район марказидаги маҳаллаларнинг бирида яшаймиз. Адам пахта тозалаш заводида слесарь бўлиб ишлайдилар. Аям эса мактабда ўқитувчилик қиладилар. Синглим 6 - синфда, укам эса 4 - синфда ўқийди.

Аям ҳам, адам ҳам давлат муассасида ишлашгани учун ерни ижарага олиб ишлаш имконияти камроқ. Лекин бизнинг

КИЧИК ТОМОРҚАДАН КАТТА ФОЙДА ОЛИШ МУМКИНМИ?

оиламиз қўл қовуштириб ўтиришни ўзларига эп кўришмади. Хонадонимиз томорқаси 8 сотихни ташкил этади. Биз шу ердан имкони борича кўпроқ фойда олишга ҳаражат қиламиз. Хўш, биз нима билан машғул бўламиз?

Биринчидан, бизнинг томорқада иш куз ойларидаёқ бошланади. Ноябрь ойларида помидордан бўшаган ерларга кўкатлар ва редиска уруғини сепаиб, уни полиэтилен клеёнка билан ёпамиз. Унинг ҳосилини декабрнинг охири ва январь ойларида йиға бошлаймиз. 20 см. кв. жойдан камида минг боғ редиска ундириш мумкин. Агар ҳар боғини 15 сўмдан сотсак, қилган даромадимиз 15.000 сўмни ташкил этади. 20 м. кв. ерга укроп ва кашнич, пиёз экиб қўйсак, улар ҳам редиска билан деярли бир вақтда етилади. Лекин укроп ва кашнич экилган ернинг ҳар 5 см кв ердан бир боғдан кўкат олиш мумкин. Бундан келадиган даромад ҳам редиска каби 20000 сўмни ташкил этади. Боя айтиб ўтганимдек,

аям ва адамлар доимо ишда бўлишади. Маҳсулотимизни сотишга вақтлари йўқ, шунинг учун барвақт туриб, ҳосилни бозордаги сотувчиларга арзонроқ нархда кўтара улгуржи сотамиз. Ундан ҳам оиламиз, ҳам халқимиз фойда кўради. Албатта, даромад ўз-ўзидан келмайди. Балки тинимсиз меҳнат орқасидандир. Кўкатлар, сабзавотлар январь, февраль ойларида тугайди. Шу пайтда биз очиқ грунтга помидор, қалампир, райхонгул уруғларини сепамиз. Бу уруғлар февралнинг ўрталарида униб чиқади. Апрель ойининг ўрталарида эса бозорбоп товарга айланади. Шу пайтда биз кўчат сотишни бошлаймиз. Асосий истеъмолчиларимиз - туманимиз ва Олмалик шаҳри аҳолиси ҳисобланади. Пскент - ҳақиқий деҳқонлар юрти. Шунинг учун қанча кўчат бўлса ҳам, бозорда ўтаверади.

Бир метр квадрат ердан 300 тупгача кўчат ундириш мумкин. 800 м. кв. ердан эса ҳаммасига кўчат эксак, 800 х 300 = 24000 кўчат

олиш мумкин. Агар бир сўмдан сотсак, 24.000, икки сўмдан сотсак, 48.000 сўм даромад қиламиз.

Май ойининг охириларига келиб кўчатларни сотиб тугатамиз. Шундан сўнг томорқага егулик учун помидор, болгар қалампери, сабзи, ловия каби ўсимликларни экаемиз. Албатта биз буларни бозорга олиб чиқиб сотмаймиз, лекин бозордан сотиб ҳам олмаймиз.

Шундай қилиб кичкина томорқадан 300 минг сўмгача фойда оламиз. Кўз қўрқоқ, қўл ботир деганлари шу эканда-а!

Марҳабо УСМОНОВА,
Тошкент вилояти,
Пскент шаҳридаги 5-мактабнинг 8-«Г» синф ўқувчиси.



ХАЛҚИМИЗНИ КАРТОШКА БИЛАН ТАЪМИНЛАР ЭДИМ

Мен мактабни тамомлагандан кейин оиламизда фермер хўжалиги ташкил қилмоқчиман. Дастлаб жамоа хўжалигидан 2 гектар ер оламан. У ерга картошка экаман. Икки гектар ердан ўртача 40 тонна ҳосил олиш мумкин. Ҳозирги нархда бу 3200000 сўм бўлади. Бу ҳосилни етиштириш учун сарфланадиган ҳаражатлар қуйидагича бўлади.

1. Картошка уруғи 5 тонна - 400000 сўм.
2. Маъдан ўғитлар 1 тонна - 18000 сўм.
3. Маҳаллий ўғитлар 10 тонна - 20000 сўм.
4. Суғориш учун ҳаражатлар - 10000 сўм.
5. Ер ҳайдаш учун ҳаражатлар - 20000 сўм.
6. Картошкага ишлов бериш учун - 10000 сўм.
7. Транспорт ҳаражатлар - 10000 сўм.
8. Колорада ва бошқа ҳашоратларга қарши курашиш учун - 20000 сўм.

Даромад солиғи, касба уюшма бадали, пенсия фондига ажратилган пулдан ташқари оиламизга 1628660 сўм қолади. Кейинчалик ерларимни аста-секин кенгайтириб, 10 гектарга етказиш мақсадим бор. Бунда яна 10 кишини ишга оламан. Ҳар бирига ойига 10 минг сўмдан маош тўлайман. 10 гектар ердан 200 тонна картошка олиш ва уни 16000000 сўмга сотиш мумкин.

Нозима СУЛТОНОВА,
Наманган вилояти, Чортоқ туманидаги 31-мактаб, 6-«А» синф ўқувчиси.

РЕКЛАМА

Ишбилармон ва тадбиркор жаноблар!

Сизларда жаҳоннинг иқтисодий тараққиётдан бохабар бўлиш, ЭҲМ орқали илмий ахборотлар олиш, тижорат ахборотларини қабул қилишни ўрганишга иштиёқ туғилса, ҳеч тортинмай бизга мурожаат қилинг.

Сизларни замонавий кадрлар қилиб тайёрлашга ёрдам берамиз. Сиз бир ой давомида малакали мутахассислар томони-

«Тонг юлдузи»га



дан компьютер сирларини ўрганиб оласиз. Дарслар уч сменада олиб борилади. Тўловлар нақд пул ёки пул ўтказиш йўли билан амалга оширилади.

Фурсат ганимат, имконингизни қўлдан

бой берманг.

Манзилимиз: Сурхондарё вилояти, Узун тумани, Баҳористон кўчаси, 3- гимназия биноси.

Телефонлар: 32- 2- 91,

Руслан БИКМЕТОВ,
3-гимназия, 5-синф ўқувчиси.



Болалар, бу сафар кўхна Қорақалпоқ элининг ижодкор фарзандлари - кечагина сиз каби мактаб ўқувчиси бўлган опаларингиз ижоди билан танишасиз.

Барно КАРИМБЕРДИЕВА, 1973 йил 8 мартда Элликқалъа туманида туғилган. 1994 йил Ажиниёз номли Нукус Педагогика Институтини тамомлаган. Ҳозирда 17-ўрта мактабда ўзбек тили ва адабиёти ўқитувчиси бўлиб ишлайди.



АСРА ЎЗИНГНИ

Умрингни ўтказма бекорга, укам,
Йўлингни беҳато танлагин, синглим.
Бемехнат бойликни қилмагин орзу,
Шайтон йўлларида асра ўзингни.

Олим бўлмасангда, беимон бўлма,
Бировлар хасмига кўз олайтирма.
Бекафан ўлсангда, беватан қолма,
Шайтон ошенидан асра ўзингни.

Вахобий аталмиш кимсалар каби,
Алдовларга учраб қилма золимлик.
Оллоҳга жой бўлсин юрагинг туби,
Шайтон қўлларида асра ўзингни.

Қалбингизда бўлсин Ватан туйғуси,
Отангиз ишончи, Она қайғуси.
Сизнинг бахтингиздир улар орзуси,
Шайтон алдовидан асра ўзингни.

Зиёда ЮСУПОВА, 1972 йил 26 февралда Беруний туманида ўқитувчи оиласида туғилган. 1994 йил Ажиниёз номидаги Нукус Давлат Педагогика институтини филология факультетини тамомлаган. Элликқалъа туманидаги 35-мактабда ўзбек тили ва адабиёти ўқитувчиси бўлиб ишлайди.



ЗЕБУНИСО

Оқила аёлдан туғилган фарзанд,
Муҳаббат, садоқат ошно қалбига.
Бераҳм отадан топмаган пайванд,
Жаҳолат бахтини тортган комига.

Ўшал вақт ўлдириб гўзал йигитни,
Назарга илмаган гулгун ёшини.

Шоҳ қизи бўлган у, бўлган малика,
Ипак либосларга чулғаниб юрган.
Бўлажак шоҳнимас, бекзоданимас,
Камбағал, оқ кўнгил йигитни севган.

На илож, на қилар ул малика қиз,
Шеърятга берган бутун умрини.
Севгисин пок сақлаб яшаган ёлғиз,
Рад этган бошқалар берган кўнгилни.

Қизининг севгисин англаган ота,
Саройга, тахтига урган бошини.

Унинг-чун мотамин тутади дунё,
Белида белбоғу, қўлда асодир.
Садоқат пойига бошини қўйган,
Ўшал қиз шоира Зебунисодир.

Muhabbat HAMIDOVA

YANGI UCH OG'ALNI BOTIRLARNING SARGUZASHTLARI

«SOVG'A»

Rustam, Sardor, Farhod narigi ko'cha bolalari G'olib, Rasullar bilan Damariqda mazza qilib cho'milishdi. Keyin uyga boradigan yo'lni yaqin qilish uchun qo'shnining hovlisini kesib o'tishdi. Qo'shnilar uyda yo'q ekan. Yo'l bo'yidagi tovuqxonada salqinlab yotgan tovuqlar odam sharpasidan cho'chib, gur etib katak burchagiga borib olishdi. Bolalar tovuqlarni bir oz tomosha qilishdi. Tovular orasidan bitta pakanagina, chiroyli jo'jaro'roz ajralib chiqib qanotlarini qoqdi, eshik tepasiga uchib chiqmoqchi bo'ldi.

-Qoyil, zo'r xo'rozcha ekan-a, -havasi keldi G'olibning.

-Yapon xo'roz bu. Qobilning dadasi har xil xo'rozlardan to'playapti. Qarang, anavi oyog'i uzun katta xo'roz dakang, anavi oppoq, dum tarog'ligi ruslarning xo'rozi, manavi jahli chiqib turgan qizil xo'roz jaydari, -tushuntirdi, -bilag'onlik bilan Farhod. -Sho'rlik xo'rozchani rosayam ko'chaga chiqqisi kelyapti, chiqarvoraman, kim bilib o'tiribdi, -qafasga yaqinlashdi Rasul.

-Eshikni ochsang, hamma tovuqlar chiqib ketadi, yaxshisi pakanani o'zini chiqaramiz...

-Farhod, yaponka siz tomonga o'tmabdimi? -Hovlida yurgan Farhoddan so'radi Komil aka. -Yaramas daydi, hech qafasga o'rganmadi-da.

-Boya molxonamizdagi somonlarni titib yuruvdi, keyin ko'rinmay qoldi, -dedi Farhod, lekin o'zi negadir g'alati bo'lib qoldi.

-It-pit yeb ketmagan bo'lsinda ishqilib, zo'rg'a qidirib bo'lgandim bunaqa xilini.

-Yo'-o'q, it-pit yemagan, -dedi Farhod ishonch bilan. Keyin yer ostidan akasiga qarab qo'ydi. Akalarning ma'noli qarashlaridan dadalari xavotirlandi.

-Farhod, Rustam, qani buyoqqa kelling-chi. To'g'risini aytib, boya G'olib bilan qo'shnisidan nimaga g'imirlashayotgandilaring? Xo'roz qani?

-Biz bilmadik. Biz olganimiz yo'q. Katagida zerikib ketgan ekan, tashqariga chiqarvordik. O'zi-ku, G'olibga ergashib ketib qoldi, -dedi shosha-pisha Rustam.

-O'zi ketib qolganmish, qani, g'izillab borib xo'rozni topib kelling-chi...

-Anuv, haligi, -g'udurlab qolishdi bolalar.

-G'udurlamasdan tezroq jo'nalar, -qo'llaridan ushlab darvozadan chiqarib qo'ydi dadalari. Aka-uka bir-birlarining qo'llaridan ushlagancha issiqda

terlab - pishib G'oliblarning uyiga kirib borishdi. Ostondan xatlashdi-yu, «G'olib aka» lab yig'layverishdi. Ichkaridan xovliqib chiqqan Bahor xola vaximaga tushib baqirdi:

-Nega yig'laysanlar, tinchlikmi? Nima gap, nima bo'ldi? -G'olib akam...



-Voy-dod, qani G'olib, cho'kib ketdimi? Cho'milishga borma degandim-a, hoy dadasi?!

-Oyi, baqirmang, sho'ttaman, cho'kkanim yo'q, -ichkaridan ko'zini ishqalab chiqdi G'olib.

-Namuncha qizbolaga o'xshab arillaysanlar. Baqirmasdan o'zimni chaqirmaysanlarmi?

-Xo'rozni egasi, xo'rozni bering...-yig'idan to'xtadi bolalar.

G'olib tandir yoniga bordi-da, yerda to'ntarib qo'yilgan tog'orani ko'tardi. Xo'rozni oldi.

-Ma, ushla. Menga bunaqa xo'roz kerakmas.

Xo'roz qo'lga tekkan bolalar xayrlashmasdan ham tashqariga otilishdi. Farhod xo'rozni bag'riga bosgancha xiqillab borayotgandi, ro'paralaridan kelayotgan kishi.

-O'xo', xo'rozing zo'r-ku, juda urishadigan ekan, menga sotasanmi?-deb qoldi.

-O'zimiz zo'rg'a o'g'irlab kelayapmizu, sotmaymiz, -Farhod shunday deb qadamini tezlatdi.

-Sen yaxshi o'g'ri ekansan, aytib o'g'irlaydigan, -xoxoladi yo'lovchi amaki.

Ular xo'rozni ko'tarib uyga kirib kelishganda Komil aka bilan dadasi hovlida gaplashib o'tirishgan ekan.

-Barakalla, azamatlar. O'zi shu xo'rozim juda daydi chiqib qoldi-da. Nuqul o'rtoq axtarib ketib qoladi.

Quloqsizning bir ta'zirini berib qo'yay, -Komil aka xo'rozini olib chiqib ketdi.

Bolalarning dadasi esa indamay uyga kirib ketdi.

-Ada, endi biz o'g'rimizmi?-sekin so'rashdi adalarining orqasidan ichkariga kirgan Farhod.

-Aybingizga vaqtida iqrar bo'lib, xo'rozni topib kelganingiz uchun o'g'ri bo'lmay qoldinglar, -dedi dadasi jiddiy.

-Urre, aka biz o'g'ri emas ekanmiz, xo'rozning o'zi daydi, -deganicha tashqariga otildi Farhod.


(Davomi bor).

МЕН ШУ ЮРТИМНИНГ ҲОКУДАЙ УПАЎ

Қадим-қадим ривоятларга қараганда инсон тупроқдан яралган эмиш. У ердан яралиб, яна ерга қайтар эмиш. Инсон қайси маконда туғилса, ўша ер унга мангуга Ватан деб ҳисобланади. Ватан эса ягона, уни ҳеч қандай зару олтинларга алмашиб бўлмайди.

Ўзбекистоним, сен қанчадан-қанча мусофир етимларни бағрингга олиб, ўстириб улғайтиргансан. Улар сени ўзларига Ватан билдилар. Ўзбек тилинг, ўзбекона урфларингни одат этдилар. Балки, шул сабабандур қанчадан-қанча Амриқо, Покистон ва бошқа чет эл фирмалари хизмат қилишяпти.

Ҳозир-чи, кундан-кун гўзаллашиб ва ёшариб бораётган мустақил диёрим, янги-янги қад кўтараётган биноларинг,



файзу тароватли кўчаларинг ҳар қандай хорижий меҳмонларнинг ақлини лол қолдиради.

Кузги боғларинг даладарингга назар солар эканман, «Эҳ, бағри кенг Ўзбекистоним, нега бунча бағринг кенг?!», деб ҳайқиргим, овозимни борица кўшиқ куйлагим келади.

Марҳум Чори Ҳамро қаламига мансуб ушбу сатрлар Ватан туйғусини нақадар улуг эканлигини англатса ажаб эмас:

*Ватаннинг тупроғи қароғимдадур,
Юртимда тонг отса шу менга басдур.
На олқиш, на шуҳрат сўроғимдадур,
Дўстлар сўраб келсалар,
шу менга басдур.*

Санобар ҚОДИРОВА

ОИСТА ЧИПТАЧИГА ЖАРИМА

Бир куни ойим билан “Кўйлик – М” маршрути бўйлаб қатнайди-ган 37-автобусда кетаётган эдик. Олдиндаги ўриндикда ўтирган 35 ва 60 ёшлар чамасидаги икки киши жуда берилиб pista чақишарди. Очиғини айтганда, уларга ҳеч ким эътибор бермасди. Бир вақт чиптачи аёл уларга яқинлашиб, жарима тўлашларини талаб қилди.

– Қанақа жарима? Мана, чипта-миз бор! – деди қариқоқ киши жаҳл билан.

– Чипта олганингиз эсимда, – бамайлихотир деди чиптачи аёл. – Сизлардан жамоат транспортини ифдослантираётганингиз учун жарима талаб қиламан. Қани, 200 сўмдан жарима тўланглар-чи!

Писта чақаётган кишилар чиптачи билан баҳслашиб кетишди. Охир-оқибат жарима тўлашмади-ю, иккинчи жамоат жойлари-

да pista чақмасликларини айтиб, кечирим сўраб кутулишди ва автобус тўхтагани ҳамон тушиб қолишди.

Шунда ойим чиптачи аёлдан:

– Айтинг-чи, сиз жарима ҳақида ҳазиллашдингизми ёки...? – деб сўради.

– Йўқ, ҳазиллашганим йўқ, – деди у. – Шу йилнинг мартидан бери шу чорани қўллаяпмиз. Илтимос, қилсангиз ёки уришсангиз эътибор бермайдиган бундай маданиятсиз одамларга жарима жуда яхши кор қилади-да. Энг муҳими шу йўл билан тозалikka эришяпмиз. Ахир, оёқ таги pista пўчоққа тўла, ёнбошига музқаймоқ қоғози қистириб кўйилган жойда ўтириш кимга ёқади?

– Қойил, – дедилар ойим чиптачи аёлга.



– Шунақанги ажойиб чорани ўйлаб топганларингга минг раҳмат.

Мен эса ўйланиб қолдим. Ўзим ҳам кўпинча автобусга музқаймоқ билан чиқиб кетавардим-да. Лекин жамоат транспортларида pista чақиб, музқаймоқ, гамбургер каби егуликларни еб ўтирган ўрнингни ифлослантириш, атрофдагиларга қанақанги хунук кўри-нишини билмас эканман. Автобусдаги бу воқеа менга қаттиқ таъсир қилди. Сизларга-чи, болалар?

Гулноз ТОЖИБОЕВА,
ёш мухбир.

ШИРИН СЎЗЛИ БЎЛИШ ЯХШИДА

25-автобус лиқ тўла одам. Бекатда орқа эшикдан тугунча кўтарган кампир чиқди. Икки-уч бекат юрмай, одамлар уни автобуснинг ўртасигача суриб олиб бориб қўйишди.

– Ўғлим, – деди тик турган қария ўриндикда ўтирган ўсмирга секин, – мана бу бувинг озгина қийналиб қолди чоғи, сенга қийин бўлмаса, қўлидаги тугунчани тиззанга олволсанг, анча савоб бўларди. Ёки ўрнингни...

– Бу кампир менга буви эмас, учирма гап қилгандан кўра тур, ўтиришга ҳаққинг йўқ, денг, – деди дағаллик билан болакай ва ўрнидан тураркан чол билан кампирга еб қўйгудек қаради.

– Болам ўтираверинг, мен ҳали толиққанамча йўқ. Бувангиз менга ачиниш шунчаки айтдилар. Сизлар куни билан оёқда юриб, биздан кўра кўпроқ чарчайсизлар, – деди кампир ҳижолат чекиб.

– Турдим-ку, энди кўп ваъз ўқимай ўтираверинг-да. – Хўп бўлади, болам. Раҳмат Сизга, барака топинг, камлик, хўрлик кўрманг. Қарилик Сизга ҳам насиб этсин!

Автобусда кетаётган катта-кичик ўсмирга ёмон назар солишди. Унинг юзига ҳеч нима дейишмаса ҳам, тарбия кўрмаганлигини билиб олишди. Чол ҳам, кампир ҳам Ниёзбекнинг кўпол қилиғини кўрмаган, андишасизлик билан айтган сўзларини бамисоли эшитмагандай ширинсухан бўлишди. Шу билан одоб кўрмаган болага одоб намунасини кўрсатишди.

“Ширин сўзим – ризқи рўзим” деган ҳикматнинг мағзини ўсмир ҳали чақмаганлиги билиниб қолди.

Тўлқин МУҲИДДИН.



ДЎСТЛАР

Хўжакент қишлоғида Салим ва Ҳалим деган икки дўст яшашади. Бир куни улар узумзор ёнидан ўтиб кетаётиб, узум егилари келибди. Шунда Ҳалим:

– Кел, шу узумзор орқасидан кириб, қоровулга сездирмай узум олиб еймиз, – дебди. Шунда Салим:

– Йўқ, бу одобдан эмас. Яхшиси бориб қоровулдан сўраб кўрамиз, – дебди. Ҳалим эса бу фикрга қўшилмай, узумзорга кириб кетибди. Салим дарвозадан бориб қоровулга салом бериб, узум олишга руҳсат сўрабди. Қоровул бундай одобли болани кўриб, бир неча бош узум берибди. Ҳалим эса руҳсатсиз узум олаётганда, катта бир ит келиб унга ташланибди. Ҳалим қочаман деб ариқ бўйидаги қамишзор ичига кириб кетибди. Қамишнинг ўткир барглари Ҳалимнинг юзини кесиб юборибди. Қолдан тойган Ҳалим бир аҳволда Салимнинг олдида чиқиб келибди ва ўзининг бу аҳволдан жуда уялибди.

Шерзод САМАНОВ,
Самарқанд шаҳар,
Темирийўл туманидаги

41-мактабнинг 7-синф ўқувчиси.

ЎЗБЕКИСТОН БОЛАЛАРИ ВА ЎСМИРЛАРИНИНГ ГАЗЕТАСИ

Ўзбекистон болалари
ва ўсмирларининг
газетаси

Муассислар:
ЎЗБЕКИСТОН
РЕСПУБЛИКАСИ
ДАВЛАТ МАТБУОТ
ҚЎМИТАСИ,
ЎЗБЕКИСТОН
РЕСПУБЛИКАСИ
ХАЛҚ ТАЪЛИМИ
ВАЗИРЛИГИ,
«СОҒЛОМ АВЛОД
УЧУН»
ХАЛҚАРО ХАЙРИЯ
ЖАМФАРМАСИ

БОШ МУҲАРРИР:
Умида
АБДУАЗИМОВА

ТАҲРИР ХАЙЪАТИ:

Шуҳрат АҲМЕДОВ,
Йўлдош САИДЖОНОВ,
Ойниса МУСУРМОНОВА,
Хотам АБДУРАИМОВ,
Мукаррама МУРОДОВА,
Суннатилла ҚЎЗИЕВ,
Эргашвой САРИҚОВ.

Ношир
“Ijod dunyosi”
нашриёт уйи

Ижарадаги Тошкент
Матбаа комбинатида
офсет усулида 39092
нускада босилди. Ҳажми
2 босма табоқ.
Буюртма - К-7937
Газетани
Абдуҳамид
АБДУҒАФФОРОВ
саҳифалади.
Навбатчи:
Феруза ЖАЛИЛОВА

Рўйхатдан ўтиш
тартиби № 000137
Манзилимиз
700129,
Тошкент шаҳар,
Навоий кўчаси 30-уй.

Тел: 144-62-34